

廳兵曹俱請依此知委申飭免之○全羅道儒生柳之春等請於泰仁縣享祀  
崔致遠以申潛合享配以丁克仁宋世琳鄭彥忠金若默金灌頒下恩額以貢  
院宇䟽下禮曹禮曹謂非如疊設之比宜許賜額許之蓋以致遠潛為本縣邑  
宰而克仁以下五人為鄉賢也致遠雖無學術之可論既厠孔廡之享則崇報  
之典容或不濫至於申潛雖登己卯賢良之薦學行未甚著顯克仁以下尤乏  
名稱如欲祠享只可以鄉先生祭社之意私自崇奉則可耳至以此請宣恩額  
於朝猥雜極矣况其䟽辭至稱先正臣於潛等諸人尤極可笑而政院矇然捧  
入該曹又曲循其言使祀典不嚴可勝歎哉○己未以李益壽為獻納李世載  
朴權為持平李師尚為正言金鎮龜為都承旨○庚申命吏曹精抄守令之屢  
典州郡治績表異者以啓○辛酉 上行祈穀祭於社壇卯時還宮○北青端  
川利城等邑戌時有赤氣如虹俄而雷聲大震良久而止道臣狀聞○壬戌校  
理南正重鄭濬副校理趙泰采修撰趙大壽副修撰閔震炯因諭諸道之教上  
劄申戒極言奢侈之害仍曰臣等嘗見士夫家厨盤之間有一異味服美之類  
有一妙制問其所自必曰出自某宮家諸宮家衣服飲食莫不慕效大內則臣  
等恐 殿下左右宮妾之崇奢尚靡有以致之也宜考 祖宗舊例以儉約之